



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

TAHNIAH MYSAVEFOOD @ RAMADAN 2024 RAHMAT ITU BERKAT

PUTRAJAYA, 9 April 2024 – Kementerian Perdagangan Dalam Negeri dan Kos Sara Hidup telah melaksanakan Program *MySaveFood@Ramadan* 2024 sebagai inisiatif pengurusan sisa makanan di bazar Ramadan secara berstrategi. Sebanyak 60.65 tan makanan dan minuman yang bernilai RM724,770 berjaya diselamatkan dan pelepasan gas rumah hijau (*Greenhouse gas (GHG) emissions*) sebanyak 113,763 kg dapat dihalang. Inilah pencapaian keseluruhan Program *MySaveFood @ Ramadan* 2024.

Program *MySaveFood @ Ramadan* 2024 merupakan kesinambungan daripada program yang telah dijalankan pada tahun 2023 dengan kerjasama strategik KPDN dan Pertubuhan Pemuda GEMA Malaysia (Pemuda GEMA). Penglibatan lebih ramai sukarelawan dan Gerakan Pengguna Siswa (GPS) daripada Institusi Pengajian Tinggi Awam (IPTA) dan Swasta (IPTS) pada tahun ini menunjukkan perkembangan yang positif bahawa usaha ini akan lebih berjaya pada tahun-tahun akan datang, Insya-Allah.

GPS ialah satu entiti berstruktur, berperaturan dan berkepimpinan yang merupakan duta kecil kepenggunaan KPDN dalam kalangan pengguna generasi baharu terutamanya di IPT. Penglibatan GPS seramai 323 orang sukarelawan pada tahun ini telah berjaya menyelamatkan sebanyak 14.52 tan makanan dan minuman di 27 bazar Ramadan. Melalui sistem pementoran oleh Pemuda GEMA, diharapkan penglibatan 31 cawangan GPS (21 IPTA dan 10 IPTS) dan jumlah sukarelawan pada tahun ini dapat dipertingkatkan pada tahun-tahun akan datang. Pembudayaan dan pemikiran menolak pembaziran dan pada masa yang sama menyuburkan nilai ihsan

merupakan antara objektif yang mampu dicapai dalam kalangan siswazah melalui program ini.

MySaveFood @ Ramadan 2024 merupakan satu sistem pengurusan berstrategi melalui usaha menyelamatkan lebihan makanan dan minuman. Ia merupakan satu usaha murni barisan anak muda yang mengumpulkan makanan dan minuman yang masih berkeadaan baik, yang tidak terjual di bazar-bazar Ramadan tertentu, dan kemudiannya mengagihkan makanan dan minuman tersebut kepada para pelajar, rumah-rumah kebajikan, golongan gelandangan dan juga yang memerlukan.

Program yang dijalankan di 139 buah bazar Ramadan ini telah melibatkan seramai 2,112 orang sukarelawan (termasuk GPS) pada tahun ini berbanding 500 orang pada tahun lalu. Perbandingan asas pencapaian program adalah seperti berikut:

Bil	Perkara	2023	2024
1.	Jumlah makanan dan minuman (kg).	25,000 kg	60,650 kg
2.	Nilai makanan dan minuman yang diselamatkan (RM).	RM300,000	RM724,770
3.	Jumlah bazar Ramadan yang terlibat.	55	139

Manakala, pelepasan gas rumah hijau yang dapat dihalang melalui program ini merupakan satu usaha sejajar dengan sasaran Matlamat Pembangunan Mampan - *Sustainable Development Goals* (SDG) 12.3 iaitu pengurangan separuh daripada sisa makanan global per kapita pada tahun 2030.

Pencapaian Program *MySaveFood @ Ramadan 2024*, dilaksanakan selama 26 hari hanya di 139 bazar Ramadan sahaja. Jumlah ini menghampiri 10% daripada keseluruhan bazar Ramadan yang telah beroperasi. Ini membuktikan pelaksanaan program ini memberi kesan positif berpanjangan terhadap pengurangan pembaziran makanan dan

minuman serta pelepasan gas rumah hijau dapat dihalang turut meningkat sekiranya dilaksanakan di seluruh negara.

Satu ekosistem pengurusan lebihan makanan sedang dirangka untuk memperkasa pelaksanaan program ini pada tahun hadapan. Selain menyelamatkan makanan yang masih elok, sisa makanan yang terbuang turut mampu diuruskan secara sistematik untuk menjadi baja kompos yang menyumbang kepada manfaat yang lebih besar.

Pihak KPDN akan terus menyokong usaha murni ini dan berharap ia menjadi satu budaya yang dipraktikkan dalam skala yang lebih besar lagi pada tahun akan datang. Kejayaan program ini dilihat daripada jumlah pembaziran yang berjaya diselamatkan dan penglibatan anak muda dalam gerakan sukarelawan yang dapat membentuk nilai ihsan Masyarakat MADANI.

Pihak KPDN turut mengalu-alukan badan-badan korporat, NGO dan individu untuk berganding bahu dalam menjalankan program-program seumpamanya ke arah menerapkan nilai-nilai murni dalam masyarakat di Malaysia.

Seterusnya, KPDN turut merakamkan ucapan tahniah dan terima kasih kepada Pemuda GEMA sebagai peneraju Program *MySaveFood @ Ramadan 2024* ini, serta kepada semua pihak yang terlibat secara langsung dan tidak langsung dalam menjayakan Program *MySaveFood @ Ramadan @ 2024*, dan berharap ia dapat diteruskan pada kerangka lebih besar dan bersepadu pada tahun yang akan datang. Selamat Hari Raya AidilFitri Maaf Zahir dan Batin.

YB SENATOR PUAN HAJAH FUZIAH BINTI SALLEH

Timbalan Menteri Perdagangan Dalam Negeri
dan Kos Sara Hidup

###